

E sabor Curasoleño den Festival di Buki pa Mucha



BIBLIOTECA Nacional Aruba ta trece e di 25 edicion di su Festival di Buki pa mucha. Den siman di dia 6 pa dia 10 di november un grupo di autor di buki pa mucha, ilustrador y contadornan di storia ta bishita mas cu sesenta scol, primario, basico y special, riba nos isla.

Biblioteca a invita 3 autor di buki pa mucha di Corsou, esta Roland Colastica, Alvin Inecia (Tio Ali) y Crisen Schorea. Nan ta bishita scol pa conta storia, papia tocante buki cu mucha y tambe pa stimula mucha pa lesa mas.

Crisen Schorea (1975), di profesion sociologo, ta di curason un escritor, cantante, actriz, un humilde y ferviente admirador di arte, specialmente arte escenico.



Algun luna pasa el a logra haci un di su soñonan realidad, esta publica su prome buki di poema titula ‘Sinti mi Sinti’.

Crisen a participa na diferente proyecto literario manera ‘Dichters in de Bomen’, ‘Literaire Tippelzone 2008 & 2009’, ‘Ban Lesa (Kinderboekenweek Curaçao) di 2014-2016 y ‘Un buki pa lesa’ di JCIOBA?.

Esaki ta prome biaha cu e ta participa na Festival di Buki pa mucha na Aruba.

Crisen ta conoci tambe como actriz. N’e momentonan aki Crisen y su banda, ‘the 8.40 Band’, ta trahando riba su prome album musical.

Tio Ali tin “frequent flyer miles” cu biblioteca, hopi biaha caba el a participa n’e Festival di Buki pa mucha. Tio Ali (Alvin Inecia) di Corsou ta un personahe bon conoci cerca nos muchanan.

Tio Ali ta entretene pa educa y e ta haci esaki cu cuenta, rima, ritmo, poesia y cantamento combina cu movimiento.

E tin pasion pa siña mucha, hoben y mayor kico ta norma y balor manera Respet, Amor, Comparti, Perse-

vera, Pasenshi, Confiansa, Ayudo, Duna y Compronde.

Roland Colastica ta un artista cu ta expresa su mes den diferente disciplina di arte. Skirbimento ta djis un forma pa Roland yega na su publico y toca nan curason. Y de facto, biblioteca no conoce un Festival di Buki pa Mucha sin Roland Colastica pasobra Roland a contribui semper n’e proyecto di lesamento aki.

Cu presentacionnan fantastico e ta gara y tene e atencion di tur mucha. Na 2006 Roland Colastica a ricibi e premio prestigioso ‘Cola Debrot cultuurprijs’.

Roland Colastica ta biaha rond mundo pa conoce diferente pais y cultura y pa sigui siña y desaroya su mes y disfruta di arte den tur su formanan y splendor.

Ademas di e invitadonan di Corsowu, Biblioteca ta spera mas escritor di buki pa mucha.

Nan ta Sjoerd Kuyper (autor di e regalo di siman di buki), Jeroen Hoogerwerf, Paul van Loon cu Manisha van Loon, Curt Fortin cu Nick van Leent y Mariella van de Beek for di Hulanda. Di Boneiro ta spera Gabriel Mercera (Tio Gabi) y Kathleen Thielman. Loeki Morales ta bini for di St. Maarten y Hilli Arduin ta un autora di buki pa mucha di Surnam.

E grupo local cu ta contribui n’e festival tan gusta ta consisti di Stan Kuiperi (ilustrador di e buki di siman 2017), Gino Vrolijk, Lili-ana Braamskamp-Erasmus, Vanessa Paulina, Sergio Tjje-A-Loi, Emerita Emerencia, Irmgard Frans, Richard Dabian, Lientje Maduro y Lily Clarisa.

Ya pa 25 aña biblioteca ta trece mucha hunto pa scucha storia, stimula lesamento y conoce autor y ilustrador pa medio di un festival grandi.

Apertura di e festival ta diabierna dia 3 di november.

Muchanan di Sint Paulusschool y diferente otro grupo ta duna un bunita presentacion riba stage pa yama tur autor y ilustrador bon bini.

Den siman di 6 pa 10 di november lo tin bishita di scol y merdia tin actividad na biblioteca. Tur mucha ta bon bini y presentacionnan ta gratis.

